

Codex Laureshamensis Teil: Bd. 1, Einleitung, Regesten, Chronik Kap. Nr. 128

Hii sunt viri misericordiae quorum iustitiae oblivionem non accipient, viri illustres, viri spectabiles, et uerae fideles huius aecclesiae, qui in diebus peccatorum corroborauerunt pietatem, et erigentes se contra filios superbiae, noui Machabaei duces, viriliter eius defenderunt libertatem, videlicet, Adalbertus comes Buobo cecus, Ezzo, Wolfgangus, Burchardus advocatus, Gerhardus, Adalbertus, Landoldus, Wolframmus, Egino. Quorum magnificam fidei devotionem pius pater Ö. digne remunerans, constituit eis sicuti Karolo magno et duobus Luodowicis, singulos pauperes in cena domini ad mandatum fratrum perpetuo assignari. Nec inmerito. Nam libertatem aecclesiae quam illi imperialibus donis et privilegiis sublimauerunt, hanc isti periculo capitis sui nobiliter defenderunt. Sapientiam ergo et fidem eorum narrant omnes populi, et laudem eorum pronunciat omnis aecclesia sanctorum. His adiunguntur principes clarissimi, vere beati, pacifici, et filii dei, stellae matutinae in medio nebulae, et columnae lucis, scilicet, Sigefridus mogontiensis, et Anno coloniensis archiepiscopi, nec non Ruodolfus, et Godefridus, duces illustrissimi, qui zelo iustitiae regali se insolentiae, vel potius inclementiae pro laurishamensi aecclesia obponentes, in tempore iracundie facti sunt reconciliatio, rectos decet collaudatio. Postquam diuina pietas procellam hanc in auram statuit, et silverunt fluctus eius, Henricus VIII rex clementem erga ipsam aecclesiam animum induit, cui etiam mercatum, itemque monetam, in uilla Lauresham, mercatum quoque cum moneta in uilla Winenheim, et in Wezenloch, per regalia precepta tradidit.